

間牙爪奮癢痾疾痛是黥驢

川芎餅

疾攻頭目苦虛疼攻疾仙家藥力弘片片雪花魁蜀產不須灌頂說三乘

艾煎元

荆榛叢裏有參苓帝造鍾英地又靈任是七年真病久承爐敷業炳丹青

甜茶

修真苦淡味仙靈自種雲腴摘玉英亘古與人甘齒頰春風百萬億蒼生

武當圖本

步九層霄闊太和盤旋八百里山河千章錦綉詩難盡一幅丹青畫了麼風月好懷時更別煙雲變態處如何看圖看透圖之外方見山間景趣多

武當紀勝集

西川青羊宮碑銘

不五

翰林學士中書舍人李奎書

原夫八十一天比太上之半壽六百萬歲當元始之初年道渺邈以難窮體希夷而莫究在無象無形之內居太初太易之前龍漢之劫弄成鳳紀之文未立藏萌芽於浩素隱根幹於尾洪二神曩肩以俱來鑿開造化三氣氤氳而互進撲散胚渾玄黃流而未凝清濁分而乍結日月星辰之內化出靈宮川原山嶽之中變成洞府則知道為萬氣之祖德為百物之宗以二儀兩曜為子孫以五行四象為枝葉當其洪肇先啓紫極後成仰其高而彌高者其上而無上八公皓首當時之未有乾坤九老白眉厥後而初生天地探其真之理臻大道之元列仙之境界延洪上士之齒齡逾遠以六千春為兩月尚歎浮生以七萬歲為二年仍嗟短景智者見之謂之智仁者見之謂之仁和光而衆曜昏慙挫銳而攢鏃盡碎玄珠匪類真璞無瑕學而知之者為中生而知之者為上三君五老觀兆人如醯鷄

七聖九皇視百姓為芻狗煦千古而冰釋成衆善而泉流至明若蒙蒙間而萬事俱照大巧若拙拙中而萬物皆成爲於不爲用於無用黜口爽於五味杜耳聰於八音忘象忘言易脫一時之履無關無鍵難開衆妙之門九萬靈仙聚集於一毛之孔三千儒術荒蕪於獨角之端故知道儒二門經綸一揆立清淨爲理體虛無爲師以上天爲大車之輪以列宿爲大車之輻駕之以乾馬之馬輓之以坤牛之牛般運無爲之功覆載自然之道光而不耀養正於蒙昧之中簡而能廉修真於仄陋之內不可得而踈矣離之而匪遙不可得而親焉用之而逾遠不退而讓不進而求被褐懷玉之人美之又美罔象求珠之士斯焉取斯移世界而入壺中吞維摩方丈之室縮地形而藏術內掩悉連王舍之城有道之根修作立天之址無名之樸標爲鎮化之元三千威儀恭謹於文風之教五百戒行肅清於釋氏之門張天爲弓調之以陰陽寒暑直道如矢激之以春夏秋冬一夫用之而無餘兆

人用之而不竭日窟月窟隱身而曾作穴居南溟北漠遁迹而聊遊水府桃源蓬島從古有而今存槐市杏壇見朝榮而暮落仙圖秘密五千載而三傳聖道靈長百萬年而一代容易而學之者似紐石以爲繩侮慢而求之者如鑽冰而待火絕巧素利顯微闡幽坎離震兌之宮宮內而咸居羽客東西南北之斗斗中而皆住真仙身駕德車輪轉於混茫之外手持壽柄指揮於開闢之前寂爾無營澹然自得化其不化則萬化而皆成生其不生則群生而盡遂虛懷待物曠意承時藏泰山於秋毫之中秋毫仍大納崐崙於黍米之內黍米仍寬大象無形五岳空空而如也大信不約四時默默而行焉真宗之教皆成不宰之功益著

太上金闕玄元天皇帝則我巨唐之高祖按國語曰自周平王七載洎于秦至開元聖文神武皇帝即三十六代之聖孫赫赫日苗布蔭於普天之下明明國葉垂芳於率土之濱當其幽原既開九氣陶蒸而未已玄化大

闡六虛流轉而勿休設不二之教門稽真一之宗本浩風吹海三迴之重作飛塵劫火銷山五度之却爲平地先道遙於青運青運既周後出沒於赤明赤明復畢九十九萬億歲貯在彈丸五千五百重天藏於卵殼殷高宗御極之際周文王演易之初神光流入於瓊胎瑞彩結成其金骨不坼不副誕彌於八十餘齡降瑞降祥過期於二萬餘晷足蹈不滅之理手握長生之文包乾裹坤把日捉月額列參午頂荷圓穹耳開三門鼻立雙柱白血紫腦蒼肝青脾項引三十五光齒舍四十八貝七色青蓮而隨步千年白鹿以呈休桑田變而雙檜不凋江河枯而九井不竭苦縣瀨鄉之里靈跡長存陳國渦泉之濱神蹤不泯七百弟子指扶桑爲故林九五帝君開日宮爲舊館詳其元始格彼厥初俯窺溟滓之前下視渾淪之後隨機設教作九古之楷模應變無方爲百王之軌範若乃歲起攝提肇開氣象一十三聖之踐柞萬八千年之應圖我太上玄元聖祖應運降跡與天皇爲師上清

下濁之初開相離未遠六合八紘之乍坼相去未遠正方圓上下之形定洪荒杳略之狀川新融而水仍晦山始結而石未堅種天上之白榆初生歷歷植月中之青桂乍出依依配四海於四神付五行於五帝是時乾象猶低坤形仍薄立極定位敷化建功我太上聖祖肩跡下降與地皇爲師分配剛柔制定寒暑地增博厚天益高明聖力難窮神功靡測萬木甲坼萬草勾萌羽族毛群區別於兌離之位介蟲鱗類支分於坎震之宮四溟之水皆空未生魚鼈五嶽之形俱靜未吐雲霞已逾清海之年又離清海之歲二聖既理四表生光我太上聖祖博施濟衆與人皇爲師三百六十之川初分血脉萬一千五百之策乍配偶奇三五三乙之神離胎於水木六丙六辛之將出孕於火風一百五十六代四萬五千餘年始稱通玄天師再號金闕帝君三名盤古先生洎乎庖羲氏之王天下也我太上聖祖以道弘濟降跡爲師仰觀圓蓋之

文俯察方輿之理教之以畫八卦指之以分  
三才助之以造書契之文製之以代結繩之  
政典墳自我而出經籍自我而生以政以漁  
蓋取明離之象一索再索用手出震之功鳳  
凰呈瑞於帝庭龍馬負圖於河洛享國一萬  
八千歲矣洎乎連山氏之王天下也我  
太上聖祖救時屈己下為帝師付之以五運  
分之以四時助之以正萬機明之以辨百穀  
變飲血茹毛之化移菁梓土鼓之音毀穴焚  
巢上棟下宇範金合土燔黍擘豚製耒耜以  
濟兆人作陶冶以利萬物天雨粟以呈瑞地  
芸稼而彰稔農食嘉穀山出器車洎乎有熊  
氏之王天下也我  
太上聖祖隱身於崆峒之中放心於杳冥之  
外帝乃親降輦輅禮展師資能摠衣以趨隅  
遂屈膝而問道當是時也榆岡凌虐蚩尤作  
亂化魚鼈為兵士以助王師變雲霞為神祇  
潛扶軍陣能弭兵於涿鹿致偃戈於阪泉東  
遊青丘之鄉北到洪隄之景受丹經於王屋  
登蒼冥於鼎湖屈軼既生莫英復出若非大

道孰可致斯洎乎金天氏之王天下也承姬  
水之源襲熊山之錄告天類帝續緒守文我  
太上聖祖乘九龍之輦降以為師號太極先  
生說莊敬之典教之以順時迎氣昭配神明  
種于六宗秩於群望乾乾翼翼得禮之宜羽  
族呈休命之以鳥官為理分布九屬以統百  
司景合璧以表靈鳳嚙圖而示貺悉由至道  
彰此帝謨逮至高陽氏之王天下也我  
太上聖祖教之以解紛塞兌治國安民滌蕩  
九黎陟明八凱有龍野紫髯之兇醜有蛇身  
赤髮之渠魁力拔不周首觸山碎天低西北  
致日月之西行地亞東南使江海而東注追  
呼六甲役御百靈訓之以微言之經教之以  
大順之道乘玄虬之迅駕或適幽陵御素螭  
以遐遊或臻蟠木觀吾仙赫萬年而一度開  
花觀我靈瓜四劫而一迴結實及乎高辛氏  
之王天下也我  
太上聖祖敷道布化濟代為師譚黃庭之妙  
言隱日遁月稱錄圖之嘉號返邑移城制九  
州之名作六英之樂封勾芒以佐蒼帝勅尊

收以翼白方封岱嶽而印金泥照寰區而開  
玉鏡飲大活之井遊不夜之鄉燔青鸞之膏  
充下仙之次饌擘黃騏之脯為上客之珍羞  
逮至陶唐氏之王天下也我  
太上聖祖暫垂至理下降為師講玄德之經  
道以匡於玄化應丹陵之瑞名冀列於丹丘  
和煦清風不作鳴條之響雍熙黃髮時聞擊  
壤之聲庖厨之內脯自生葢饋失味山谷之  
醴泉潛湧麴孽無功達四聰以闢四門立五  
事而敷五教披鹿裘以食糲饌端拱於土階  
掛鶴髦而飲流霞凝思於瑤圃有虞氏之王  
天下也我  
太上聖祖譚無為之理講離合之經三苗克  
俊四罪咸服百揆時序五典慎徽懷明神之  
珠賜昭華之玉眉與髮等表踐祚之嘉祥壽  
與天齊彰延齡之景福甄一十六相用二十  
五臣致百辟以協和如魚在水感兆人之歸  
湊如蟻慕膾化靈氣為天書何勞筆力結卿  
雲為寶殿不假人工夏后氏之王天下也我  
太上聖祖克匡王道爰作帝師譚德戒之經

行爲國之法柳沐風雨刊槎山林成九年理  
水之功爲四載勤王之業卑宮陋室盡力於  
溝洫之時禮服縷衣飾身於黼冕之禮導馬  
頰而奔流竹箭擊龍門而迅激桃花救兆庶  
而皆免爲魚濟陸土而永非成海胸羅玉斗  
掛天文之在躬手展瑤圖懸國命之由已故  
知大道者三教之冠寃上德者百聖之宗元  
成湯氏之王天下也我

太上聖祖權離左極下爲王師說長生之經  
體自然之道去三面之網開一目之羅獸遠  
逝而莫縈禽高翔而不胃引萬方而罪已數  
六事以責躬話之以八素七真講之以六虛  
十訣千歲桃花之蜜味掩朱漿九垓薤葉之  
蔬滋露紅露乘三光而電轉駕六氣以煙騰  
窺海濱如涓涔視嵩衡如繭粟餐風飲露跨  
空攝虛以十洲爲少遊之宮以六極爲暫別  
之館驅僊中士役試下仙素髮一莖懸起萬  
斤之石綠筠數尺變成百丈之龍得之者七  
祖超昇失之者一身迷悞必在堅修慎習棄  
苦忘辛可以陶冶二儀埏埴九土青羊肆者

按本紀則

太上玄元大帝第二降生之所自殷道否閉  
周德凌夷陸海沸騰百川振動山鳴谷吼雨  
嘯風號歷藏史以同塵棄柱史而隱跡東離  
魏闕西度函關乘青牛宛轉之車駕白鳳道  
遙之輦徐甲執御從仙帝以爰來尹喜占風  
知道君之必至暫別而三千甲子曾作赤童  
相逢而八百年齡永依黃老潛傳妙訣暗付  
微言重爲千日之期再結一時之會暫朝元  
始却上天中之天永奉宗師重歸象外之象  
開寒靈之丹殿登眾寶之瓊臺坐紫金之牀  
凭碧琳之机太清仙伯仗星光錦文之旗大  
極仙公執月華命神之節皆拜首稽首以心  
觀心於是勅青帝之青童化羊於蜀國乘紫  
雲於紫府降瑞於王宮將停不復之聲須及  
來斯之乳俄聞喜至頓止嬰啼爰從赤子之  
身却變白頭之士頃刻而身餘十尺須臾而  
面放五光頭建七曜玲瓏之冠肩垂九色離  
羅之帔衛士逾億從仙成群感十方之衆眞  
徧滿家廓應八表之瑞氣充塞虛空香散九

微之煙花飛六出之雪將離蜀土欲化胡風  
遠適流沙長移橫俗及身毒屬質之國教煩  
陀阿柱之王志剛強懷戾之心起烹焚整刺  
之意巨錡燃湯以沸地我則入之如涼泉積  
薪烈火以連天我則坐之如紺霧挾白挺者  
觀如蓬草持赤刃者視若鉛刀四天之兵衆  
俱來聲喧震霹萬里之神祇共護力轉山河  
八十種之獯戎皆歸清化二千國之獯猥永  
革昏風俗既變矣道既成矣分身作佛濟如  
來千劫之功降跡爲師救王者萬機之務至  
若銅渾測運玉曆推禎天七五而一三及九  
乃滿地八六而二四到十乃盈變通陽九之  
災窮研百六之數雖定羲軒昊之代無以免  
斯高辛唐虞之朝不能避此粵以廣明元祀  
歲在上章月當大蜡巨猾開壘於天邑渠魁  
倣擾於國步兵纏九野群臣咸議於省方蛇  
起陸風四嶽齊迎於巡狩長鯨呀口聞飲澧  
吐錫之聲封豕橫牙衝列刃攢鏃之隊牛虻  
未搏食吾黎庶之膏象蟻未除穴我樓臺之  
地塵蒙華蓋盜梗天衢九龍齊駕於雲輿玉

輪西轉萬乘同迴於坤軸金闕南開涉水則  
波神捧舟登陸則地祇扈蹕太玄城內化出  
行宮濯錦江邊權安正殿執玉帛者數盈萬  
國列鸞鷲者位滿千官鷄林之群來朝鼇山  
解纜鶴拓之城入貢象駕來王當戎夷率服  
之辰成文軌混同之日苗八未格方資益贊  
之謀扈氏延誅正賴胤師之力熊羆豹韜之  
將俯立軍功龍角羊角之山可追聖瑞二十  
八化猶乘白鹿而來一百六災必跨蒼虬而  
救潛扶宗社幽贊子孫赤光照灼於庭臺太  
平顯兆紫氣晶瑩於梅條元吉尤彰稽彼變  
通明茲感應尋其靈跡果獲實觀上有古篆  
文曰太上平中和災於是驗其六字表此百  
祥擊之即聲類鳴璆觀之則狀如弘壁歷周  
秦漢魏之代玉篆仍新經晉宋梁隋之朝銀  
鈞不故藏諸<sub>下五</sub>韞匱秘甚絨<sub>十</sub>膝克盛皇猷顯標  
青史歲代綿邈疆井變移舊址苔封古壇蕪  
沒仙鄉故里半落俗家真境餘風惟殘瓦礫  
枯松夜月移聞玄鶴之聲暮草秋煙空聽沙  
鷄之響當時雲洞多隱狐狸昔日芝田盡生

禾黍遐追靈跡顯驗休積皇帝特下明詔初  
造靈宮恩賜內外行庫錢二百萬爰徵班匠  
乃速厥功於是木神送材九層崇構地祇獻  
土百堵俱興水伯進泉以爲池山靈走石而  
作礎巍我雲閣乍似化成岌業霞堂初疑涌  
出簷張羽翼棟壓虹蜺粉壁霜凝丹楹火巨  
懸籠倒景戶闢長宵湖濠新成儀形乍降神  
情欲語似講五千之文意貌將行速化十方  
之士金爐芬馥寶奉回旋乍觀出檻之羊猶  
疑跪乳初觀如練之馬尚慮嘶風庭剪蓬茅  
重生瑤草園除壺種再吐瓊花岡阜崔嵬樓  
臺顯敞齊東溟圓嶠之殿抗西極化人之宮  
牽劍閣之靈威盡歸行在簇峨嵋之秀氣半  
入都城煙粘碧壇風引清磬故得五老下降  
四真俱來畫地而成其江湖撮土而作其山  
嶽坐致風雨可以倒洛傾河立起雲煙可以  
反晝作夜化草木以成軍旅變士馬以成叢  
林如斯出師豈惟百勝如斯伐叛何啻七擒  
是以天災流行盡彼盈虛之理曆數倚伏稟  
其否泰之宜左慈呼召于神兵鞭笞群盜許

遜指揮于力士剪蕩狂妖所以陰陽兆人彌  
綸萬聖邦騰丹水屢陳誠告之功牧野昆陽  
累獻遺俘之捷戈甲耀乎八水營壘塞乎四  
郊陣勢雲橫軍聲雷動血灑空而驟雨赤沙  
漲野而飄雲黃困獸摧牙長蛇畏尾郊野人  
之膏潰觀楚幕以盡空德均而義士致身氣  
直而王師難老度日而長鳴金鼓曾不告勞  
終年而不解鐵衣未嘗言苦既而鳳城光復  
龍德昭明枉矢當弦穿月之功奚用長竿在  
手撞天之勢何爲遂至修鯢脫泉狂兇入匣  
師道運末斷領於赤心之徒榛山數窮劈腹  
於蒼頭之輩况逆巢千紀悖氣凌空鳴蟻蝮  
七八餘齡聚豺狼數十萬衆傷殘九土凌犯  
二京蓋因祝天綱以緩誅布仁風而寬戮遂  
偷生之五載併除惡於一時蚩尤之塚旣成  
堅埋鐵額長狄之喉已斷永戡雕戈立此神  
功實資道力我  
太上金闕玄元天皇大帝爲天地父母作帝  
王宗師歷教三皇皆萬八千歲候乎四氣交  
會五運合同國位永付於子孫聖祚上齊於

日月克紹萬八千之歲矣我高祖神堯皇帝  
 應天受命曆數在躬以鄉觀鄉去仙鄉之無  
 遠上德不德增帝德以彌高較九赤之班符  
 封山印海追八景之仙輅輟霧盤雲負辰垂  
 旒當陽闡化我太宗文武皇帝握乾闡坤修  
 文偃武大禮無體百禮而盡執根元大音希  
 聲一聲而振動今古天賜勇智繫虎豹如束  
 芻神助皇威踰蛟螭如結蚓還真返素遊藝  
 依仁以無繩為繩縛六雄與五霸以不器為  
 器籠四海與九州然後爭於不爭則戰爭而  
 永息欲於不欲則嗜欲而長消方士衆臻真  
 公來格安期之棗異狀大若瓠瓜園客之蘭  
 殊形磊如盆盎垂衣一百五十代享國一萬  
 八千年伏惟  
 聖神聰睿仁哲明孝皇帝陛下克紹丕圖統  
 茲大業心懸壽鏡身享福庭帝道中興國根  
 深固永保神器長正皇綱虎牙將軍領八千  
 之勇士龍頭元帥提百萬之精兵永以鎮定  
 區中永以削平天下巨鼉斃而形軀塞海長  
 鯨戮而鬚鬣插天或多或焚盡千山之木以

烹以饑竭五湖之泉紫焰腥膻青萍膏血杖  
 日墮落字星墮墜蒼旻開豁黑氣消亡獻巨  
 逆之三顧告行朝之九廟耀武威於英代立  
 京觀於神州歲越大椿年逾巨浸天睽北顧  
 備法駕以返堯庭帝澤東流乘仙輿而懷魏  
 闕集群牧以頌瑞朝諸侯於明堂撫逸搜沉  
 興滅繼絕八龍雲霧降禹稷之天書二武聖  
 文炳商周之帝德中階平而國泰至德正而  
 時雍成寶祚之神功由太上之聖力端拱垂  
 衣恭己正南面而已矣劍南西川節度使太  
 尉兼中書令穎川郡王陳敬瑄夏日高懸吐  
 赫曦之可畏德星永聚實祥瑞以明標遙關  
 龜城速迎龍駕獻瓊璣以酌大化如轉碧天  
 移蓬萊以作行宮似離滄海郭琪扇搖於行  
 伍阡能搔動於山林韓秀昇聚蚊為雷陽師  
 古積聲聞日生擒者有同縛鼠誅戮者無異  
 剗羊舞百獸於庭前堪標玉牒役五丁於魔  
 下可碎鐵山雖文翁武侯之才蕭猷王濬之  
 策未可與儔昔韋南康鎮成都二十餘載郭  
 汾陽為輔弼二紀在朝比其勲庸量其惠化

則請留九閩之儲一裘之歲未為多矣耀陳  
 氏劍南之政掩裴度淮西之功具載典彝永  
 光勲績行在都指揮使左神策軍中尉十軍  
 軍容田令孜岷岡玉柱獨力扶天太華金蓮  
 張心捧日佐聖而出為國而生有逾千越萬  
 之才有聞一知十之智曖然和氣助青帝發  
 生之仁卓爾高情仰素王垂訓之道觀帝符  
 而五賊皆見握人鏡而萬象難逃聰可聽其  
 無聲明可察其未朕弼時立德開國成家賞  
 罰無私九王之諸侯懷惠恩威普及十軍之  
 將帥歸心克己推誠虔心奉道古原層構敬  
 之而無異丹臺舊貫規繩仰之而如昇白日  
 禮無上之帝主事威儀之法王神獸八千衛  
 犀象如螻蟻天丁三億轉海嶽如萍蓬周尚  
 父之功成身居第一漢鄼侯之績著才獨無  
 雙鍊鼎銘鍾紀勲頌德左僕射平章事蕭遘  
 器業絕倫神秀貫古華海歷淮湖之浪學山  
 凌衡霍之峰天植國禎文滋相業一匡皇化  
 八乘洪鈞函丈之間布奇兵之億萬跬步之  
 內安率土之蒸黎黃鶴頻鳴雖召公之可控

青牛不喘或邴吉以難知吏部尚書平章事  
韋昭度宗廟重器社稷令臣當昂位以星懸  
鎮台階而山立蘊珪璋特達之德植松筠貞  
固之心窮訓典以立身正風正雅調鹽梅以  
味道肥國肥家仲父上空空就九三之位大  
林擣斃虛垂二八之名兵部尚書平章事裴  
澈澤馬表瑞天驥呈才雄節貫時清風滌俗  
銀漢橫空而高朗玉繩垂象之英華學川則  
四瀆波瀾書林則五松煙雨正氣凜於朝野  
直道貫於羊腸自蠟職瀛洲登庸昭代重持  
傳說之舟楫弄乘臯陶之鈞衡皆磨智刃而  
裁恭腰盡淬文鋒而剗卓腹內飛龍使揚復  
恭甲門華胄鼎族令名三教精通九流澄澈  
體物則左張却立緣情則鮑謝推先論昆仲  
而八龍掀鬢譚經史而五鹿折角秉樞衡於  
累代貫名氏於百家稟吳季札之仙姿抱孔  
文子之敏惠青山蘊玉發群岫以耀光潑水  
懷珠起一川之晶彩內樞密使開府儀同三  
司田胤禮四瀆比位五星炳靈清掩玉壺義  
輕金諾智圓若月長垂助日之光辯注如川

每湊為王之海秉氣正直執心溫恭王佐宏  
才帝臣重器當軸而身迴地紀持樞而手正  
天文宿稟道門素欽真教信言不美常行質  
奏之詞法語可尊每契和平之理內樞密使  
驃騎大將軍李順融三傑挺生千山發秀元  
禮龍門之峻慶及令孫少君鶴駕之高福滋  
靈葉掌萬機之密務濟一國之黎人公清而  
水鏡含虛正直而未繩讓美博學則丘墳著  
績操觚則錦繡成文實腹守真棄百慮於襟  
懷之外虛心待物納八荒於方寸之間監軍  
使驃騎大將軍兼三川制置都監劉景宣景  
宿呈祥卿雲布彩風骨俊邁才量宏深淮南  
王之瓊枝駭鸞不遠河上公之蘭友踰鶴非  
遙贊護克勤勳庸永著右街威儀明道大師  
尹嗣玄大仙靈苗高族茂葉太上玄元之上  
足文始真君之哲孫七歲悟道十三逢師紫  
玉之骨將成終遊閻苑黃書之文已究即上  
朱陵道士李無為國源清派天葉芳陰真訣  
千重窮研成達仙經萬卷諷覽無遺皆同在  
師門結為道友三天鳳前化靈氣以成書一

粒龍丹駐童顏而度劫星冠月帔上禮於元  
皇虹鬘雲輿前朝於大帝金籙五斛暗吐仙  
絲瓊節一雙遙迎真侶自昔忠臣明主咸理  
國以昇天應曆運以救時蘇生靈而畢績少  
皞顯頊皆上紫微之宮君與太公俱乘碧霞  
之輦其宮室牖戶臺榭池塘似雲霧之結成  
如丹青之寫出七十二之福地三十六之洞  
天神仙之窟宅相連以青城為戶牖真景之  
風煙不雜以岵冢為壇臺可以濟度四迷開  
弘七部仙衣非製而自有豈假紉針仙車不  
駕而自行曾無轍跡九重天上白玉為京千  
雉城中黃金作殿披袞服而身掛日月戴冕  
旒而坐鎮乾坤天網正而四氣和國步安而  
三元序手執長生之柄制定白駒心藏要道  
之根控乘赤鯉况乎代變時遷綿歷於三千  
餘歲建邦立國崢嶸於四萬餘年門巷新成  
人煙漸熾當時闌闌髮髻如存今日宮庭精  
新尤盛七色鳳輦駕幸仍頻九斑龍輿巡禮  
彌敬太虛天館常開不夜之門無極福堂永  
對長春之景氣連碧落光掩赤城臣職忝禁

林身叨詞客涉儒海而素淺渡文河而不深  
董仲舒五彩之蛟稀來筆下揚子雲三清之  
鷄少到毫端愧無黃絹之才難紀紫煙之瑞  
詞曰

洪源肇開 浩劫無際 恍惚大道 希夷象帝  
太初既隱 太始來繼 玄黃在殼 清濁未蛻  
天地之前 一十萬歲 山比我久 如電之逝  
海比我大 如絲之細 與釋比效 空門永閉  
與儒並功 壹甫無勢 昭德塞違 解紛挫銳  
設教隨機 應變無滯 三皇益明 五帝增睿  
率土皆奉 群生咸濟 樓觀發軔 函關掛轄  
霸賓闡化 申毒布惠 無狀之狀 無聲之聲  
去莫可送 來莫可迎 強字之字 強名之名  
太虛之上 黃金為城 杳冥之外 白王作京  
煥赫六極 牢籠八紘 萬國同酌 百谷咸傾  
莫得而竭 莫得而盈 淺而行者 長居利貞  
深而行者 永致太平 凜凜烈氣 化作天丁  
鬱鬱勁草 變為神兵 火刀電耀 霜劍虹明  
莫戮封豕 瓜剖長鯨 地古風變 俗阜時清  
年代綿邈 歲月崢嶸 新宮是建 永觀厥成

赫赫高祖 明明聖孫 開鑿造化 剗剔胚渾  
把捉日月 包裹乾坤 鸞踏鳳跡 虎步龍蹲  
鳥卵之中 可納穹曼 黍粒之內 能藏崐崙  
塵波澄澈 智浪淵淪 迷羅自解 瑩鏡難昏  
萬象俱盡 惟道獨存 三教爭長 惟道獨尊  
心藏五賊 國靜九門 蓬蓬諫鼓 汎汎衢樽  
五方入貢 八表爭奔 車徒川霧 租賦雲屯  
魏峨玉皇 煥赫金籙 靈官八海 水府四瀆  
堯湯寶位 舜禹天祿 巨寇稟珍 神州克復  
去召千神 來臻百福 天轉碧輪 地旋黃轂  
獻玉十珏 貢金九牧 寒暑運行 禎祥倚伏  
宮蛟斃刃 狂兇殪鏃 軒鏡在握 殷繩當木  
瓊臺九層 銀蠶五斛 手指青牛 身騎白鹿  
洞啓括蒼 天開玉屋 皇根國葉 帝宗天族  
明堂瑞拱 元臣啓沃 四海萬方 無息不服  
九虬天矯 雙鳳迴旋 鶴駕清漢 鸞跡紫煙  
累行盈百 積功滿千 丹瓊樓高 上接九天  
碧玉壇峻 下降八仙 大卧蓬島 龍耕芝田  
地有譙道 東走東川 人居上德 南御群賢  
大活之井 長生之泉 延洪聖祚 萬八千年

鶴涅不緇 烏非染黑 然於自然 得於自得  
何以發蒙 內辨其惑 何以開悟 中修其式  
如車指南 似星拱北 隱見無常 變化不測  
大象難包 二儀益塞 大智難展 六合陋仄  
長生之柄 永壽之域 朝服刀圭 暮生羽翼  
廟獻三顧 風清萬國 靈觀親構 群仙來格  
瓊宮寶臺 玉書金策 豐碑嶽立 巨壺鼉通  
詞惟頌美 文匪誕飾 鸞鶴翹躄 龍蛇騰躡  
紫氣氤氳 赤光欽絕 七聖握圖 九皇執勅  
梵宇增光 儒宮出色 端冕明堂 垂旒御極  
運齊三五 慶延萬億 開闢象區 咸仰道德  
永致中興 皆從帝力  
臣奉宣令撰青羊宮碑銘  
伏以  
太上金闕玄元皇帝大道之祖宗上德之根  
本先天地而出後天地而存遊於五劫之  
中經歷乎一千萬歲古青羊肆白鹿神蹤紫  
氣氤氳赤光照灼靈輓玉篆永表中興九萬  
群仙皆在指揮之下三億力士咸居役使之  
間故能運動乾坤轉移海嶽化魚鼈為兵士



剪我銅頭變軍旅為叢林埋藏鐵騎潛扶聖  
運冥助王師殄滅渠魁廓清宇宙懸三兇之  
首級獻九廟之威靈克盛帝圖永平國步臣  
跪承睿旨仰奉皇慈昧學謏聞屬詞荒鄙其  
碑文今已撰訖謹隨狀奉進以聞者

右翰林學士守尚書兵部侍郎樂朋進奏  
謹具如前

中書門下牒西川節度使

牒奉勅金闕降祥紫氣接度關之狀瑤壇闕  
瑞赤光騰發地之文粵有玄符留于古篆當  
午夜而龍蛇搖動六字分輝後一年而狼武  
蕩平八紘無事克昭靈貺獲啓中興考帝祖  
之微言顯神功於景運得不標於道觀銘在  
蜀川流傳千百萬年紀我一十八葉樂朋龜  
職司內翰首冠近臣妙迴擲地之金錢入他  
山之石鋪陳盡善察邑當其於先知述作無  
遺子建何勞於獨見宜刊盛事以證斯文宜  
今西川節度使於本觀建立牒至准勅故牒  
中和四年九月八日牒  
西川青羊宮碑銘

宋東太一宮碑銘

附西太一宮  
中太一宮

不六

翰林學士承旨中奉大夫尚書省郎中  
翰林學士承旨中奉大夫尚書省郎中

建皇極奉天統稽茂典崇明祀斯聖人之能  
事也惟我后得之翰玄化倂鴻休福蒸民佑  
至德斯元神之景貺也惟皇宋受之於錄鴻  
祚誕膺火德稽命曆之成敷允謂昌期牧造  
化之全功諒由真主肆我應運統天睿文英  
武大聖至明廣孝皇帝握乾符而御寓宅坤  
載以開階斷鼇足以立四維重張地紀受龍  
圖而畫八卦載炳人文聲教而定寰中拱揖  
而朝天下遂使蠻夷戎狄皆趨於象闕之前  
傑侏兜離合奏於宮懸之下鴻圖巨業恤萬  
古以無階睿化淳風幾一變而至道亦何必  
神遊姑射始洞其希夷歲在攝提方稱其開  
闢而已哉加以昭事天地統和人神郊丘之  
盛禮繼行寓縣之靈祠必葺乾坤以之交泰  
風雨為之弗迷帝道式敷頌聲斯作繇是萬  
機多暇逸禮成修宣室問神每凝情於秘錄  
靈臺觀象思索隱於常文以為虞舜之納於  
大麓也則曰禋於六宗漢后之茂其丕構也

則曰祠於五時禮神之道從古攸然將與物  
以皆春必為民而祈福乃以太平興國八年  
歲在協洽春三月詔立太一宮於皇都之巽  
地所以宅神靈而昭睿德也臣謹按太史公  
書云天神之貴者曰太一太一之佐曰五帝  
古者天子常以春秋祭太乙于東南郊牲用  
太牢昔漢武帝既行之於前而唐玄宗亦祠  
之於後其禮亞二郊之祀其位次兩儀之壇  
夫如是則崇重威靈從可知矣又聞諸陰陽  
家流云太乙之神其類非一則有君基臣基  
之號大遊小遊之名或則司水旱之權或則  
主兵荒之沴唯五福太乙上循五宮下視九  
土所至則民皆富壽所臨則歲必豐稔詩謂  
百凶以之而不作書云五福由之而必臻蓋  
七曜之歲星四時之春令也則知歷代英主  
前朝舊章尊而祀之良有以也先是日官奏  
議方士獻言且云五福之以躔當蒞四宮之  
分野况將去遠碣之弊俗撫吳越之舊封請  
就彼方預修靈宇殊不知聖人與二儀合德  
天子以四海為家惟萬乘之所都即百神之